



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

Periodu: 2011

Edisaun: 22 Juñu 2011

**JSMP kontinua hala'ó treinamentu ba Polísia iha Distritu Ainaro no
Manufahi**

Iha loron 14 Juñu tinan 2011, Programa Monitorizasaun Sistema Judisial, liu husi Unidade Justisa ba Feto, realiza aktividade treinamentu ba membru polísia iha Komandu Distritu Ainaro. Tuir mai iha loron 17 Juñu 2011, JSMP mós fasilita treinamentu hanesan iha Komandu Distritu Manufahi. Programa treinamentu ne'e ho tema "*Lei Kóntra Violénsia Doméstika no Direitu Penál*".

Programa ne'e realiza tanbá hetan kolaborasaun diak husi komandante Polísia Distritu Ainaro no Manufahi ho ninia membrus tomak. Programa ne'e realiza tanbá hetan apoiu finanseiru husi *The Royal Norwegian Embassy Jakarta* iha fundu feto asesu ba justisa nian.

Partisipa iha treinamentu ne'e hamutuk ema nain 43 husi membru polísia Komandu Distritál Ainaro nian nain 22 no Komandu Distrital Manufahi nian nain 21 ne'ebé mak kompostu husi unidade Investigasaun, VPU, Polísia Komunitariu no unidade sira seluk.

Diretór Ezekutivu JSMP Luis de Oliveira Sampaio, hateten katak, *programa treinamentu ne'e ho objetivu atu asegura no hametin membru polísia sira nia kuñesimentu konabá lei aplikavel liu-liu informasaun konabá Lei Kontra Violénsia Doméstika. Tanbá maske lei refere tama ona iha vigor durante tinan ida ona iha ninia implementasaun, maibe sei iha dezafiu barak inklui menus informasaun husi autór xave balun ne'ebé mak sei afeta ba iha efetividade implementasaun lei ne'e rasik*".

Iha parte seluk Komandante Polísia Distritu Ainaro iha ninia intervensaun haktuir katak nia enkoraja membru polísia sira atu partisipa ativu iha treinamentu ida ne'e, tanbá programa treinamentu ne'e fo benefisiu bo'ot ba membrus polísia, liu-liu konabá Lei Kontra Violénsia Doméstika atu nune'é wainhira halo intervensaun iha prosesu kazu VD tenke bázeia ba kna'ar ne'ebé mak lei ne'e define ona.

Nune'e mós Adjuntu komandante Polísia Distritu Manufahi, wainhira halo abertura ba treinamentu refere, haktuir mós katak, *aktividade treinamentu ne'e importante tebes tanbá nu'udar polísia ne'ebé hanesan asistente ba Ministériu Públiku iha prosesu krimínal presiza iha*

kuñesimentu klean ba lei aplikavel atu nune'e bele ajuda Ministériu Públiku iha prosesu investigasaun kriminal ho efetividade no optimal.

Aliende ne'e komandante nain rua wainhira halo abertura ba treinamentu iha kada distritu nian, haktuir katak treinamentu refere persija mós atu hala'ó ho continuidade atu asegura nafatin kuñesimentu membru polisia nian konabá lei aplikavel.

Durante sesaun diskusaun iha treinamentu ne'e, JSMP nota katak, membru polisia ne'ebé partisipa iha treinamentu ne'e, tantu husi Disitritu Ainaro no Manufahi hato'ó sira nia lamentasaun konabá implementasaun Lei Kontra Violénsia Doméstika. Tanbá tuir sira nia observaun katak, profisional sira seluk hanesan profisional saúde sira mós iha obrigasaun bázeia ba lei ida ne'e seidauk iha informasaun klean ba lei ida ne'e, nune'é dala barak afeta ba efetividades apoiu no suporta ba vítima violénsia doméstika.

Partisipantes sira mós lamenta katak, maske Lei Kontra Violénsia Doméstika regula ona kna'ar husi entidades hotu hanesan Polisia, Profesional Saude, Advogadu no mós profisional sira seluk, maibe iha realidade hatudu katak, parte saúde sira rasik husi Disitritu Ainaro no Manufahi seidauk hetan treinamentu ne'ebé espesifiku ba lei refere, nune'é sira hanoin katak, sei nafatin infrenta dezafiu iha prátika kuandu entidades balun la intende didiak ho lei ne'e.

Refere ba kestaun hirak ne'e membru polisia sira sujere atu iha futuru bele realiza mós treinamentu ba iha profisional Saúde iha Ainaro no Manufahi no distritu sira seluk iha Timór Léste.

Observasaun JSMP ba programa treinamentu ne'e hatudu katak, polisia sira ativu tebes iha diskusaun tanbá tuir sira, lei foun ne'e regula espesifikamente kna'ar polisia nian ne'ebé servisu ba kazu violénsia doméstika.

JSMP hein katak ho programa ne'e bele apoiu hametin diak liu kuñesimentu membru polisia sira iha aspetu responsabilidade sira nian hodi fornese apoiu no medida ne'ebé apropriadu no nesesariu ba vítima violénsia bézeia ba jéneru sira.

Atu hetan informasaun kle'an, favor kontaktu;

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Landline: 3323883/7295795